




春暉樓四六





休寧汪蓉洲著

春暉樓四六

初集

聯萼堂藏版

春暉樓四六

吳孟麟蚤音艸序

休寧汪芳藻蓉洲彙

今使懷蛟董子早羨鵬搏夢鳥羅生無傷蠖伏文
雄繡虎邀黃絹幼婦之品題句妙探驪叨紫袖昭
容之激賞殿上製雙鷹之贊藻挾鸞箋天邊橫一
鷗之飛名題雁墀將見梧岡鳳起方鳴得意於卷
阿柳浪鶯啼正聽好音於上苑豈非展大丈夫雄
飛之志顯奇男子犀銳之才哉我友孟麟吳君派
衍讓王姿凌季子螢窗攤卷居鄰桃葉渡頭兔穎

休寧汪蓉洲著

春暉樓四六

初集

聯萼堂藏版

春暉樓四六

吳孟麟蛩音艸序

休寧汪芳藻蓉洲彙



今使懷蛟董子早羨鵬搏夢鳥羅生無傷蠖伏文
雄繡虎邀黃絹幼婦之品題句妙探驪叨紫袖昭
容之激賞殿上製雙鷹之贊藻挾鸞箋天邊橫一
鷗之飛名題雁塢將見梧岡鳳起方鳴得意於卷
阿柳浪鶯啼正聽好音於上苑豈非展大丈夫雄
飛之志顯奇男子犀銳之才哉我友孟麟吳君派
衍讓王姿凌季子螢窗攤卷居鄰桃葉渡頭兔穎

抽思聲出杏花邨裏訪莫愁之韻迹詞詠鷓鴣尋
芳樂之遺蹤賦成鸚鵡步名邀笛新章叶鸞鳳之
音樓號穿鍼美句織鴛鴦之錦或斟紅蟻於落星
岡畔酒換綺裘或染綠螺於夢筆驛前香生繡管
而乃紀瑜學富思捧檄以娛親江總才雄遂束裝
而作客舟過彭蠡快瞻萬頃銀濤路出匡廬遙望
千尋雪瀑落霞秋水逸興偏多破浪乘風奇懷愈
厲於是指金臺而挾策氣欲摩霄向銅市以停驂
文如倒峽無煩書壁共識奇章不俟碎琴已知正
字然而輒塵歷亂悵去國以年年明月淒清歎思

鄉以夜夜況以文采風流之士適遊悲歌慷慨之
區宜其對物色以攄懷頓饒嘆喏撫景光而寫意
彌覺纖絛也僕以菲才謬來上國黃鸝乍轉輒感
薊北長楊紫燕纔飛便憶江南芳草碎香心於鳥
語寄綺想於蜨魂自媿羈人譜蕪詞於蟬噪何圖
快友顏華製以蛩音示我此編屬之分訂臨風卒
讀字字清新按節細賡言言高潔譬諸宵翌傍涼
砌而不染一塵擬彼寒螿鳴高槐而早空萬籟釐
爲一卷約有多篇兼命鄙人起而爲序嗟乎秦少
游流連時序頻興歸雁之吟庾開府蕭瑟關河數

度啼鳥之曲在昔移宮換羽徧帶商聲值茲曼玉
攬金尤多秋氣推敲斗室人異鳧鷖唱和天涯硯
誇鸚鵡桃花潭水深情誰念汪倫蘭蕙中林博學
疇逾吳淑君多成於揮塵毋分長嘯曼聲儂已目
爲雕龍不啻黃鍾大呂

比物連類字字精工恍筆下生花洵毫端有舌
程叔才

寄園分詠新綠小序

晴光歷亂飛殘楊柳之絲春色闌珊織就薔薇之
綺步銅街之十里徒悵輭紅縱蠟屐之一雙擬探
新綠偶偕良友適過寄園花氣盈盈徧是紅芳紫
豔粉容灼灼任教蜨卷蠶含爾乃新葉參差都拖
嫩碧柔條婉嬾乍染大藍吹入眉端增淺山之嫵
媚分歸鬢畔映薄霧以纖鬆暗水穿苔輕陰澹蕩
好風送檻疎影菁蔥香痕尚在高枝紅膩猶留密
樹畫簾翠惹肯令草色分妍曲榭青搖比似花時
更好在諸君連茵命酌思暈碧以裁紅惟主人即

席高吟遂分題而限韻體拈五字人賦一章紅蟻
光浮非有心於待月黃鶯聲滑似無計以留春園
中撩畫之樓牆外送鞦韆之架停杯對詠何妨
白隋淺斟擊鉢催詩恰傍綠陰深處

絲靡多態試一詠歌香生字裏

許立巖

閒園無題詩集序

商隱擅纖絲之製體播西崑飛卿工金粉之篇詞
空北部綠窗春細詠韓偓之香奩翠幙風柔叶韋
莊之樂府羅帕織元稹之句譜就會真香囊繡居
易之詞歌成長恨然非衆香國裏夙種情芽五色
簾前徧開意蕊必不能喚真真於紙上笑靨如親
繪灼灼於毫端香魂欲隨也閒園主人衛霍勳高
錫圭五等錢盧詩妙刻燭千篇疊石栽花布置而
閒情灑落吟風嘲月推敲而逸興縱橫而乃才邁
和凝芳思轉曲人如張輯綺語偏多鄉號溫柔搦

管即成古意調翻薄倖劈牋輒擬無題主人以此
名其詩也賤子爲之言其概焉今夫藕絲無力纔
出水以纏絲柳絮奚心每因風而輕薄芳年十五
早嫁王昌錦字三千未勞蘇蕙或相俚一晌繡幄
行春或密約三更香階待月鞋提金縷魂銷弱緒
千迴帶綰霞綃意感同心雙結非煙非霧快吟稱
意之歌疑雨疑雲頻唱定情之曲然而美緣易隔
好事多訛別緒惺忪非爲梁間燕語綺懷歷亂寧
關樹上鶯聲欲語還慵含嬌似倦愁開鸞鏡畫眉
黛色猶新怕展鴛衾枕臂香痕未落對茶縠之旖

旖玩荳蔻以依迷繡閣常閒寂寂柳邊春信畫簾
高卷沈沈花外漏聲入夏晝長團扇微消粉汗當
秋夜永熏鑪暗逗香肌嫦娥原隔銀河窈窕須藏
金屋寒窗急雪忍違同夢之歡曲室流雲誰解相
思之苦別韓翃於南國腸斷章臺盼宋玉於東牆
夢生巫峽乍離乍合別成萬種情懷爲恨爲歡更
是一般滋味此三唐才子爭尚鏤香刺黛之章而
一代騷人用效滴粉搓酥之作也藻敢誇詞癖比
文通而寄託偏深空負情癡較伯輿而清狂倍甚
每尋芳草暗惜香塵纔見桃花便思人面柔腸攪

我竊耽夫綺密微吟韻語撩人適對此清新麗什
庾蘭成箋飛翡翠駭綠紛紅徐孝穆筆架珊瑚澄
霞散綺釐爲一卷約有多篇迺命鄙人用成蕪序
嗟乎聽琵琶於江上頓濕青衫覓羅綺於筵前驚
回紅粉相傳上客每留意於蟬鬢蛾眉豈識主人
聊藉題於鏡花水月永叔詞芬蘭畹亦帶香心廣
平賦豔梅花奚傷盛德何況一塵不染萬想皆空
雖展卷而色可傾城不妨倩小紅而協律然構思
而聲驚擲地更宜浮大白以澆愁君流連於曉風
殘月之時情長情短僕洄溯於沅沚澧蘭之際心

寫心藏謾撰駢詞敬書鳳紙

憑虛測有沿想圖空雜錯之變無端靡曼之態

匪極洵所稱錦心繡口也

廖西躔

寄園庚辰匝歲雜感詩序

原夫流苴菜以參差權輿比興采芙蓉之澹蕩祖
禰風騷蘇李則領袖卯金陸潘則笙簧典午麝粉
傅於六季字字皆香驪珠探自三唐言言散彩詩
城疊築扞雅揚風韻府克諧縱金夏玉然而李泌
善感懷之作骨具煙霞謝鯤工漫興之篇曾全丘
壑非饒逸氣毋輕筆架珊瑚稍異謫仙未許箋分
翡翠即令步宣城之五字徒苦捲擷叶梁國之四
聲終嫌假借其或新機偶觸片語稱工不過妙什
可賡數篇已竟僅能驚小巫之座敢云登大雅之

堂若乃有語都超無思不曲以官爲隱王叔朗方
外放歌逐日愛吟杜少陵閒中獨賦運靈心於萬
變衝口而句挾飛仙疊新韻於四章探喉而言皆
入化瀾翻濤湧非惟誇獨步於八紘霞蔚雲蒸正
可快單行於千古吾鄉寄園夫子生自蓬萊間氣
應山川之秀名高臺省雄文噪江海之才邇因暫
寄清班益復專精偉製聊將補袞爲霖之妙用頻
搜編蒲輯柳之異書左太沖絕少別營到處惟施
鉛槧王仲任并無他嗜是間都設縑緗而乃網羅
史乘之餘偏耽吟詠蒐討誌林之暇不費推敲得

趣於翰墨之中置情於淒暄之外凌顏轍謝屢年
有甲乙之編嘲月吟風問歲得庚辰之集蓋以蕭
散衰公優游邸舍風流賀監嘯傲園亭址屬月張
傍九衢而布勝地誇雲起開三徑以搜奇別有洞
天恍桃源之誤入總非塵境疑蕙圃之娛遊千章
之古木干霄萬竅之奇峰插漢商彝周鼎錯落琴
尊硯匣筆牀縱橫卷軸何意輒紅颺市得此仙都
適供太白豪吟成茲絕調有如曉鶯聲脆依紅樹
以催詩早蜨飛輕繞綠楊之罨畫興來擊鉢吟聲
出芍藥欄前意到揮毫韻語步櫻桃花下餞春有

作滿地紅鋪入夏行歌參天翠滴嵐光雲濕挹爽
氣於西山碧影陰濃拂涼颺於北牖何妨枕流漱
石任教煮茗焚香徘徊翠篠之叢不知有暑坐臥
碧梧之蔭脩訝迎秋桂號小山喜好香之入夢菊
芬深圃愛貞色之凌寒雁唳天空一塵不染烏啼
月落萬籟俱清蘆管頻吹偏帶商聲蕭瑟橘林乍
熟又驚晏歲崢嶸杯浸葡萄勸兕觥於阮籍簾飛
柳絮羨鶴氅於王恭敷雪繭以抽思麗竝數枝綠
萼染霜毫而杼抱清逾千朵冰花孰知四季如馳
早已七言累帙流連時序俯仰景光借微雲疎雨

之詞當紀月編年之作禽魚花木寄意行間風雨
晨昏移情字裏顏曰雜感用以流傳爲詩正六百
首之饒即韻在三千律之後今夫錦蟠五色機杼
屢更簫奏九成宮商數換拾遺之千彙萬狀原非
一韻所成放翁之因事寫懷亦復五聲各易試觀
巨集真所希聞不謂鴻篇實爲僅見使非貫穿五
庫恣才調之發臯焉能吐納萬川縱文情之浩瀚
譬諸海市須臾而氣象千般擬彼霞城頃刻而光
芒四映總無片言之複彌彰一韻之新而況奇思
紛起盡訝神來生面另開儼同宿構飛卿八叉之

捷尚遜其多陳思七步之能猶輸其博洵離奇之
莫測亦變化以難窺者矣藻也學類蟲鑄識同蠡
測金臺作客謬從輦下以停驂玉尺量才獲向亭
前而問字乃於函丈析疑之下示以匝歲感懷之
篇猥命鄙人製為斯序識苧蘿秉傾城之國色見
者無敢效顰羨昌黎擅蓋世之才華讀之爭為浣
手

撮大旨以立言可作寄園詩譜○吾友蓉洲曾
懷灑落有鳶飛魚躍之致及其坐一室中聲息
不聞謚如也為詩文略無停筆然一就坐即栩

栩欲動諧談角藝登高臨下忽又據案疾書如
是數四而文成矣驚才絕艷輒壓儕偶予嘗謂
之曰君真知者動耶蓉洲亦復唯唯白楚惟

王宛虹詩集序

於時蝶胷遊絲人烘軟日鶯銜飛絮天放新晴偶
逢入夏之辰得近暢春之苑兩堤御柳曳碧水以
織鬆千樹宮花鋪絳霞而綽約 皇居自壯無取
乎綺疏金鋪別院雖寬偏陋乎雕楹刻祀境以幽
而曲折布成自在林巒地以曠而紆迴繪就天然
圖畫方擬瀛洲閭苑未隔仙都何意茅茨土階猶
存聖世極目而漫思恭紀慙非班馬雄才回眸而
未盡低徊適遇鄒枚上客其人也換鵝貴胄幼鍾
慧業於三衢夢鳳仙姿長運靈心於六庫子安脫

豪訥宿構於胃中仲任觀書駭淹通於市上襟期
瀟灑日對此君雋望風流何論餘子酒斟宜斗興
酣工擊鉢之章筆夢如椽意到揮擘窠之字張馮
語能驚座頓邀劉尹之知庾信文素擅場旋應趙
王之教當筵設醴諸公固是難同隔席覓賢此客
得毋小異樺燭三更頻剪刻羽引商宮門半夜常
開倚聲選韻或題稱應制賜出綵毫或詩擬拜恩
分來宮紙早朝句就剛傳漏轉銅龍下直篇成纔
見香消金鴨銀沙翠淺堪尋芳草之鈿繡陌紅鬆
并試長楸之埽藉柳浴蘭之候漫興尤多浮瓜沈

李之時抽思不少他若翠波南浦惜別情深綠雨
東風懷人念切過平泉之別業適意琴尊訪韋曲
之名莊怡心花鳥碧綾委地抒豪致於銀箏檀版
之間紅袖傾城寄閒情於歌扇舞裙之外莫不援
題而賦即事以吟約有多篇釐爲數卷聞之劉楨
徐幹鄴下著其英聲沈約陸倕西邸傳爲勝友在
彼桂山分詠尚矜春華秋實之名況君蘭坂談經
恰際文恬武熙之日緡金匱久藏之秘本抉奧摛
精讀石渠未見之叢編吞江納海宜其晰疑之暇
追雅調於高岑論古之餘播元音於沈宋欣見聞

之益富字字清新喜才調之彌高言言綺密也藻
也質異長卿猥懷題柱才殊正字敢效碎琴賦難
語乎三都惟賤子橫受覆瓿之誚體敬師乎六季
而先生謬加抽簞之稱乃於勝地之遨遊披襟悵
晤隨出名篇之絡繹按節狂歌兼命鄙人起爲茲
序此日梁園賦雪追陪不忝乎正人他時上苑凌
雲供奉定呼爲才子不辭蚓唱用綴駢詞

精工典麗之中字字切貼真駢體造五鳳樓手

也叔鳴韶

北上紀程詩自序

僕也學類管窺才慙穎脫輕攜襜被敢擬乘風破
浪之賢深怯關河況在驚雁聞蟬之候爾乃舟移
練浦夢攪櫓聲棹指錢塘情迷帆影略向蘇隄而
吟嘯旋從茗水以夷猶碧浪湖頭處處煙波環市
金閭門外家家羅綺成叢汎細浪於梁谿錯落布
雲中亭榭衝洪濤於瓜步空濛現天際樓臺二分
之明月絲華難消旅況九曲之濁波澎湃彌感雄
心隱隱權歌旣備經越吳佳麗麟麟車迹又初歷
齊魯欽欽遵古道以遙驅怕見柳橋野鶯傍前村

而寄宿愁聞茅店荒雞路出郊城平蕪歷亂途循
沂水晚樹蒼茫遙望孔林萬世挹風徽之峻近瞻
泰岱五雲籠日觀之高古碣叢祠流連曷極殘碑
斷磧憑弔何窮旣而策轡畿南雅聽彈箏別調停
驂趙北空傳挾瑟佳人河夙著乎滹沱冰瑩玳瑁
地漸鄰乎輦轂波浸琉璃過盧溝而曉月流光
桑乾暗渡抵上國而初陽叶律黍谷剛吹三千里
亭涉短長未過當壚而勦酒五十日程兼水陸聊
因題壁以濡毫爰紀遊蹤偶成里句倘嗤傖父任
供覆瓿之資敬質大方寧比囊琴之碎

搖翠管而星河注瀉傾錦囊而珠斗瀾翻俊逸
清新罕見倫比

戴田有

賀那士毅新婚詩序

徽調綠綺悠揚和竝奏之弦慢豔紅絲綿麗綰同心之結熏籠繡被句詠劉瑗睂月靨星詩裁褚亮霞帔施於錦幄李都尉愛賦鴛鴦仙娥下自瓊樓盧殿元親邀鸞鳳乍停軒蓋爭看隔巷新人低響珮環共說盈門淑女簪名璫瑁由來却扇徵歌釵號鳳皇自昔催妝製曲竊聞士毅慧業窮文選之樓不忝吳剛前身在廣寒之殿姿凌洗馬妙解吹笙學富雕龍每驚抽算北部之才華盡讓西崑之體製逾新當孫洙釋褐之年爲潘岳結褵之會人

間樂事天上佳期用有一言聊陳四座今夫五陵
裘馬多徵逐於銀鈿七葉貂蟬早流連於金粉纔
歌舞勺情耽豈寇之詞甫悟諧聲意蕩櫻桃之什
及夫黛描張敞終朝色表眉尖粉琢秦嘉鎮日波
橫眼角方沈酣於溫柔鄉裏孰浸淫於翰墨場中
今則夙澹濃情早敦至性居外艱而辭奠雁屢思
注補白華洎大比而擬乘龍便欲雲栽紅杏乃才
人不可一世偶未逢君而名媛雅愜三生還能事
母遷延既久幾賦標梅節序頻移爰賡采荇歡正
諧乎雙美候適屆夫初陽人喧日在牽牛恰逢織

女我謂風高刺鳳宜配參軍傳添線於宮娃
繡十香之褥羨呵毫於國士急須登七寶之牀朱
鳥窗窺何嫌弄墨翠鴛鴦堂啓時用抽書觀白雪之
霏微在謝韞能吟柳絮誦青雲之直上顧李程久
隔花磚定宅揆於合卺之辰許相國擔當宇宙成
博議於開奩之下呂右丞組織春秋是知大丈夫
逸氣摩霄不屑效隈紅於荀粲佳公子奇懷騫漢
無難追拾紫於宋祁也僕來從吳會空負風流雪
豔之區旅寄燕臺願交鳳翥龍驤之胄適以吾家
康樂託誼淵源因而上國侯芭披襟几席常諮奇

字意切服膺偶劈蠻牋敏同叉手鴻濠匪遠本自
足志抗千秋燕喜剛初寧止頌眉齊百歲芟香奩
之浮語寫斑管以贈言他年間喜尊開我識魁天
下士也此日合歡鈴繫君試會月中人乎爲兆先
聲漫題里句

吐詞香豔能不使綺閣益添春色耶

李範思

大宗伯吉水李公四使序

竊聞天使班崇羨乘軒之獨往王臣任重悛負弩
以先驅宣慰江州遍觀風俗分臨益部上應星辰
而況人重緋駟合南朔東西而徧至望隆錦節統
文章政事以齊宣斯誠九重特簡之殊恩抑亦
千載非常之奇遇可無揚扃以紀遭逢我師大宗
伯吉水李公根盤天上學駕區中秀拔鑑湖早具
范韓丰采文雄玉署夙工燕許弘裁崇階游歷乎
容臺共仰持衡宗伯天節屢光乎驛路尤誇奉
詔儒臣用有一言竊陳四座今夫才貢王家寓內

慶賢書之盛星躔并野關中跨天府之雄賓興幸
屆乎明時主試端資乎哲匠公則譽播石渠明懸
水鏡凜簡書而甄拔不染一塵鎖棘院以搜羅
無虛三輔金蓮燈燦光騰落雁峰頭玉筍班連頌
溢影蛾池外奉使關西可誌一也若乃學校重自
熙朝聿興六德人文甲於薄海爭說三吳使非歸
大冶以陶鎔焉能顯鄧林之圭璧公則風維八代
識炳千秋作吾道之干城克副倚毗於楓陛稱
斯文之宗主彌勤造就於芹宮鼓震澤之文瀾磨
鈎砥鈍昌紫陽之道脈酌雅秉經奉使江南可誌

二也至若望及岱宗奉專祠而肅事禪稱梁父崇
歷代以告馨必遣精白之廷僚方協明禋之典禮
公則忠夙格天誠能動物適曠典頒行於臣庶恩
沛海隅致隆儀用饗乎山川封升日觀珪璋最潔
卿雲高燭乎碧霞簋簋維虔瑞氣遙連乎黃峴奉
使齊東可誌三也若夫恤阡危於閭里撫綏勤
綸綍之頒諮疾苦於京畿采訪重輶軒之寄疇起
千郊之瘠色允稱一路之福星公則重念民依弘
敷帝澤金錢發於內帑經賑給則人出溝中
粟菽貸於太倉精考核則吏行冰上集飛鴻於芳

旬歡聲動易水之波化碩鼠爲樂郊喜氣溢恒山
之界奉使冀北可誌四也芳藻空懷題柱未遂棄
繻韶歲橫經即識歐陽於當代壯年挾策竊依梁
國之公門擬向日而賦長楊賡揚有忝感回春而
甦枯木噓植何窮自媿迂疎謬見賞於牝牡驪黃
之外實叨高厚敢忘恩於飲食教誨之中欣聞擁
節之四周榮生行李回憶張旌於千里彩煥皇華
開郡國之文風布 朝廷之德意爲霖作楫在吾
師並傳遺愛於褰幃染翰劈箋惟賤子聊誌芳聲
於攬轡

詞采麗逸波委雲流擷庾鮑之芳鮮披徐陳之

華藻弟迎年

奉送少宗伯兼大司成邵公總制兩江序

竊聞作楫爲霖端資碩輔建牙持節必擇正人惟制閩之宣猷實 朝廷之注意昭威嚴於策府使

相權尊凜清要於樞臺儀同秩峻而况星躔牛斗統三鎮之旬宣境隸楚吳總兩江之文武建業則龍蟠虎踞千里提封豫章則天寶物華百城襟帶必如召公分陝始稱 九重眷倚之衷庶比郇伯勞周能造萬姓和平之福吾師少宗伯兼大司成邵公熙朝燕許盛世臯夔質粹珪璋夙具有容之德學融經史早全不器之才兢兢懷許 國之忠

翼翼凜致身之節自升朝籍猷績丕昭游歷勲階
公忠懋著司成六館韓昌黎洵是名儒分典九儀
張魏公無慙宗伯矢寅清於貢部潤色 皇猷勤
啓沃於 經筵靖共爾位追隨 御蹕正叨侍從
之班簡畀中樞特拜 俞往之命蓋南省爲屏藩
之重地實切撫循而西江接閩粵之巖疆尤崇彈
壓文物甲於九寓絲華肇自六朝閭閻極生齒之
繇緩懷匪易財賦擅寰區之半課最維艱崇樸去
奢亟待轉移乎風俗揚清激濁共仰釐剔乎官方
整戎行於河清海宴之時並需元老正士習於戶

誦家弦之境務得真儒岳牧兩都咸遵節制東南
半僻悉稟指揮治旣統乎軍民責綦重矣位復兼
乎將相爵彌崇焉加以要區屢勤 睿慮蠲租賜
告數從 巡守以推恩察吏安民每遇 省方而
加意屏森嚴之仙仗懷保情殷詢疾苦於窮簷如
傷念切此所以慎求督府非其人不居歷選廷臣
實惟公克副也爾乃除書甫下齊欽 當宁之識
韓琦 寵詔初承共喜憲臺之來裴度挹丰裁之
峻整笑比河清規氣宇之端凝量同海闊將見一
塵不染人在鏡中纖翳皆空吏行冰上競練悉協

仁聲溢長蕩湖頭威惠兼施美政被武陽驛外緩
帶映西州之月叔子仁流雅歌看南浦之雲文翁
化洽墩名謝傅是間之草木向榮閣號滕王到處
之湖山生色若震澤若皖江若潁水盡成蕩蕩之
恩波爲鍾山爲天柱爲洪崖並霑灑灑之惠露才
由敏見佐 聖治之雍熙德以誠孚體 皇仁之
寬大保釐開重臣之府鈴閣風清弼亮殿 天子
之邦沙堤日暖芳藻技媿蟲鐫識同蠡測擔簦躡
屩漫作客於金臺握槩懷鉛猥觀光於石鼓頻年
負笈獲立程門此日橫經得親馬帳參苓有黍粢

收藥籠之中桃李自慙竟附門牆之末正感殊恩
於北面頌叶菁莪欣瞻福曜於南天榮生桑梓鴻
聲遠播部屋騰歡重秩新膺柏臺煥彩賤子沐清
輝之先得竊擬近水樓臺我師慶 帝眷之有加
旋繪凌煙姓字

典麗商皇頌颺得體

熊藝成

送朱西山先生出守章貢序

任隆列岳使君篆造玉麟職重專城刺史符膺銅
虎涖股肱之名郡雅藉旬宣書姓字於御屏不忘
簡在榮頒金紫彰五馬之旌旄勤綰銀黃垂雙熊
之軒蓋或自黃堂而奏最入拜三公或出紫閣以
宣猷尊臨千里自昔班齊宰相於今地過諸侯然
必二千石之得人廉明率屬庶幾十萬戶之受福
愷悌宜民而況郡隸豫章星分斗野雙江波匯界
閩粵以爲衝五嶺峰高合舟車而畢集帆懸灘峽
估客偏多戟列營門重兵特設臺名章貢王陽明

開府之都山峙崆峒趙清獻分符之地嘗聞師帥
最說劉彝何異循良又逢朱邑吾鄉朱西山先生
雲嶽鍾靈霞瀛挺秀承紱陽之家學理析關閩挹
白雪之冲襟量涵湖海丰裁卓犖早懷破浪之奇
才氣通明已具昂霄之異華年鴻漸即待詔於鴈
班上國鸞騫旋含香於鳩署韋維善度支之職九
府持籌鄭谷居司寇之官五辭執法勲階洊歷星
應文昌譽望彌崇任專方面褰帷伊始知承流宣
化之匪輕叱馭方初識易俗移風之最速爰從四
座敬布一言今夫息事寧人固無妨於玩鶴揚清

激濁要不外於懸魚設非凜楊子之四知焉克成
張公之一信先生則處膏不潤孔奮之立節稜稜
沈水留香吳隱之勵操矯矯鬱孤臺峻恒披兩袖
清風塵外亭幽恰映一溪廉水此異政之可浚者
一也若乃珠還合浦原誇高潔於孟嘗鑰辨沙門
尤頌神明於柳慶必令吏行冰上方爲人在鏡中
先生則纖翳皆空曾早分乎涇渭一絲不爽案自
判乎毫銚彈燕辨羊重播奇聞於金精山外破雞
咒虎佇喧卓識於翠玉樓前此異政之可浚者二
也然而發奸摘伏黃文疆不媿神君撫弱綏強陳

太丘更稱盛德假若尚水滴石穿之刻何如樂召
父杜母之寬先生則性本慈祥沛隨車之時兩心
勞撫字爲到處之福星和易而人不忍欺噢咻而
屬皆大治登兆民於衽席遠追鹿轂以行春作名
教之干城近接鵝湖而興學士歌棧樸戶樂桑麻
此異政之可浚者三也爾乃紆紱以臨將爭迎乎
郭伋垂軒而出用奉餞於表宏賞紅芍於豐臺光
蟠錦綬曳綠楊於上苑色豔青旂或把袂而願遲
太尹之綏或劈箋而分贈賢侯之駕賤子文慙徐
庾摘詞浚異政有三先生治懋龔黃課績奏循聲

第一

揄揚以發藻汪洋以樹義可稱有典有則

吳小詹

送王漳源郡丞新任嚴陵序

曉鶯頻轉上客悵乎尋花晨馬長嘶僕夫戒其行
李鳳城芳草每布離筵燕市垂楊慣催征蓋同買
臣之領牧懷綬自金水橋邊誇景倩之登仙乘軒
出廣寧門外輕裝絡繹多從輦下以徵詩行色
紛紜爭向盧溝而祖道況乎才過趙肅適膺符初
夏之辰人是王尊正叱馭富春之地爰搖兔穎用
譜驪歌朗陵王漳源先生濯柳奇姿植槐貴胄幼
全慧業翻五庫之瑤編長具靈心擎一枝之銀管
傳青箱之家學教秉鯉庭工黃絹之新詞文雄虎

觀而乃葵生幽砌向日偏殷竹剖專城爲霖更切
望郎佐郡諸君旣各贈七言才子之官鄙人則獨
陳三美聞之廉叔奉帷固期化俗毛君捧檄端爲
娛親假若九折途長歎關山之多阻三巴路遠訝
水土之異宜斯即勤封鮓之孝思能無感慈烏之
別恨今則邾聞魯析所違不數舍而遙梁灌楚瓜
相距無一旬之隔效扶輿於潘岳頤養官齋咨行
縣於不疑平反訟謀不改晨昏之節無乖溫清之
歡斯美一也若乃調琴玩鶴趙清獻獨見從容驚
枕投籤錢武肅偏耽絲劇設也寢沐俱廢無能一

刻稱閒咨稟盈前必致五官竝用雖王事不辭乎
鞅掌而簿書亦過於疲神今則朱紱宣猷案無留
牘黃堂貳守室有賜書地大遠乎衝途何妨歌風
圻雅政自臻乎化境常教息事寧人練經術於暇
時播循聲於窮壤斯美二也且夫丹山碧水飛逸
興於江淹香閣北樓寄遙情於謝朓苟其溪遮毒
霧絕少林巒山擁蠻煙難尋丘壑縱獲有時而坐
嘯終傷無地以行吟今則波湧桐江淺深漾碧峰
聯梅嶺遠近堆藍訪嚴子於百尺釣臺笙簧名教
憶戴顥於雙柑斗酒鼓吹詩腸借秀麗之名區供

風流之仙吏斯美三也藻學媿窺園志慙破浪當年執經武水每懷異政於希文此日挾策薊門幸接神君於逸少光風霽月在賤子方樂披雲惠露福星惟彼都已殷望歲初舒驥足共推拔萃之士元乍拂隼旟無忝宜民之召父將見一塵不染匪惟繼憲府清白之風并知三美克兼早復報天朝循良之績

寓開合於排比之中工組織於控縱之內所謂以筆語者也若餽飭牙慧那得有此生氣

李欽侯

送李近修歸試文江序

鶯囀鳳城苦留春之無計馬嘶燕市悵送客之何頻滿林飛婉孌之絲夾路躡芊緜之草歌桃花於潭上漫言余是汪倫染柳汁於堤邊衆羨君真李固爾其根盤天上前身本屬謫仙秀拔區中隋地即成才子煙籠畫戟煥七葉之貂蟬香護賜書裝五花之卷軸絕去綺紈之習潘郎擲果偏多揮來錦繡之篇江令生花最早蘊五車而兼饒慧業稻辨琅邪夢雙管而果擅驚才文工臺閣藜光吐碧每焚銀鴨於三更槐燼舒黃便展霜蹄於千里暫

辭日下言別風前向珂里以著鞭諸君既分吟七
字對金臺而判被賤子亦聊贈一言爾乃郡隸廬
陵星分斗野香城山峻駭文筆之高撐吉水波雄
訶錦標之屢奪班揚接踵競遊鳳沼之中王宋比
肩直到鰲峰之上人文冠於薄海自昔爭誇甲第
萃於高門於今獨羨蘇瓌膝下喜蘇頲學有淵源
韓億階前識韓維胷全經緯操穿楊之絕技千條
翠柳皆揉穩拔桂於仙梯一帶畫簾盡卷名題雁
塔在他人固悵殊榮策對鸞坡惟吾友要非異事
聞之永叔譽流千載豈專在乎文章廷秀望重三

朝實共欽其勳節排和議於牽裾之下忠簡不媿
諫臣建直言於釋褐之時文安早儲相業略陳前
哲竝稱百世之師急望吾賢宜作千秋之傑也僕

也三年京洛未邀上苑以凌雲一代宗工幸炙師
門而立雪猥以校讎之役得交咸籍郊祁深叨麗
澤之資幾歷晦明風雨更季良之愛我不禁服膺
惟叔度之知余正欣聚首屬雲程之發軔挽繡勒
以濡毫此日心與地遙而銀浦風和莫遂藥闌之
共賞他時名緣實副而鑑湖水繞定知蓉鏡之重
懸

春秋傳云志和音雅與之知樂即駢體之三昧也步驟春容聲情絲邈固宜聯衡盧駱方駕徐

庾 趙侯赤

送舒廷士南歸序

僕本吳儂偶來燕市才慙正字敢從輦下以碎琴詞遜涼州未向旗亭而畫壁每蹋鞅紅十里輒感羈人何圖寒碧千尋適逢悵友爾其人如叔寶過江而逸興偏豪質比士衡入洛而驚才愈妙宗慙之乘風破浪會自有時房齡之聳壑昂霄已非無具脫驂上國共欣袁灌之素交把臂天涯復託郝王之密戚頓忘旅況稍慰鄉思知己往還正可借茶香而話舊芳年存舊未幾賦椒頌以吟新春溥九重陽回萬戶皇都景物喜高探乎五雲帝里風

光許縱觀乎半月於是聯裾競出竝轡同遊門入
西華一路之香車雜沓橋通北苑夾隄之古木參
差旋登白堦以徘徊獲觀紫宸之巨麗雲裏之龍
樓鳳閣映綺旭以曛曩天邊之複殿重宮拂彩虹
而縹緲上林樹密金瑣晴開太液池寬銀河凍合
屋傍皇居之外更自成邨亭峙靈沼之中都宜入
畫脂香逐隊不辭羅韞泥融金粉遺芳咸說梳妝
樓近於是探奇蘭若攬勝梅檀金碧莊嚴別是龍
天法象瞿曇清淨何誇鷲嶺仙都旣風日之輕柔
更綺羅之組織貂圍霧鬢靴襯珠履以凌波鳳

裏雲鬟窄袖裏珊瑚鞭而掠影尋芳未晚君謂香韻
撩人拾翠方初僕歎風流帶我若乃堂名天主鐘
號自鳴小磬大鑪隨高下而天然協律瓊簫瑤管
應宮商而自在諧聲審音者已集趙國佳人觀樂
者非止延陵公子旣而冰輪乍滿節適屆乎元宵
火樹爭懸光早生乎霽夜千門的爍鬪豔銅街九
陌紛紜高燄銀燭燈前按拍叶絲竹之五音月下
停車照嬋娟之一色蓋畿甸久沐垂裳之治海宴
河清故士女得追擊壤之風衢歌巷舞與君徵逐
繇華旣開遊子之顏慨我羈栖佳麗益觸勞人之

想而乃疎梅剛放纔從玉漏以傳柑行李忽催遽
別金臺而折柳高賢行亟良友情深唱驪歌於通
彙園中譜鸞笛於清平調裏觴傾紅蟻在諸君頗
重其行樹轉黃鸝至鄙人益難爲別春心歷亂祇
解嗟春客緒迷離何堪送客而況我也思歸未得
望白雲而神往江南君兮遄返有期浮青舫而路
從薊北舟移濟水是間之關塞雄奇帆過邗溝到
處之鶯花旖旎回經茂苑準值紅酣綠戰之佳辰
擬到故園定在山悅水嬉之淑候相逢老父爲報
平安倘遇同人徧申契闊念數月披襟異地旣偕

遊於鳳城鶴禁之傍知今朝握別他鄉長寄懷於
落石齊雲之畔

就遊覽上生出情緒乃爾纏絲斐亶亦是文家

得間處

李近修

李澄園太史塞松歌題辭

側聞烘日芳梅雅有和羹之用凌寒勁柏堪稱作
棟之材況此貞松生斯絕塞託根不偶鍾恒嶽之
菁英挺榦尤奇渥桑乾之浸灌蒼姿落落只許棲
鸞翠實離離偏宜巢鶴濤聲間作送潮汐於萬里
城邊雲影亂鋪布煙霞於九霄空際綠光漏月枝
以盤鬱而彌新黛色參天葉以蕭森而益矯此昔
賢聞響每坐嘯以賞心而太史倚風遂行吟而遣
興也爾乃寫交柯之磊砢秀擢行間描偃蓋之輪
菌奇生字裏貫四時而不改感人於擬金戛玉之

餘託千古以自期寄意於刻羽引商之外奚必畫
工鹿韭競買胭脂何妨種徧龍鱗暫依泉石益堅
風節任飽經塞上之冰霜終染露華自灑作區中
之霖雨

蒼勁中復饒妍麗短篇奕奕正足兀傲一時

弟行洲

秋影樓詩集題詞

拾遺領袖騷壇發皇萬象供奉縱橫詩苑卓拔千
秋句播區中蘇頌有巨公之目章傳禁內李嶠喧
才子之名一則秀縕煙霞纖塵不染一則文工臺
閣五色相宣常思兩者之難兼竊悵茲編之互擅
叔祖東山先生誕自藥珠綺歲箋吟芍藥染來柳
汁韶齡鏡影芙蓉玉樹共推早標聳壑昂霄之異
瑤林獨秀奚羨懷蛟吐鳳之奇嫺嫺未載之叢篇
咸經綵筆委宛難窺之祕本盡入錦囊茹古涵今
張茂先之博瞻吞江納海杜元凱之淹通都賦有

三雞林爭購法書無二鳳沼傳觀爰以華年膺斯
殊遇班先玉筍王沂公語必驚人藻掞金閨呂萊
國才尤服衆三長學邃屢邀特眷於楓宸七步詩
成夙駭驚才於茂苑蓋由下帷名地蘇舜欽得意
行吟把卷高齋尹彥明潛心翫讀宅傳言子啓南
土之英華山號虞公占東吳之丘壑自響屨館娃
而後沿爲美人羅綺之鄉泊栽花疊石以來遞稱
韻士琴樽之藪巖巒瀟灑萬竅玲瓏林麓陰森千
尋突兀珠簾倒卷訝晴瀑之飛翔玉鏡高懸喜尚
湖之映帶紅橋綠水入畫偏妍竹榭花廊催詩愈

麗以故春華集裏誇才調之無雙秋影樓頭擅吟
謠之第一也爾乃身全仙骨夙饒風月之懷地屬
靈區大得江山之助賞奇晰義座有蘭言倡汝和
予階餘草色雪中梅萼姑未問夫和羹日下杏枝
且先探乎碎錦櫻桃乍熟妍詞綴織錦之箋菡萏
初舒麗句倩夢花之管流連風物盧綸最富豪情
俯仰景光崔顥尤多逸興懷人秋水常郵薛業之
篇訪友剡溪非汎玉猷之棹援題命意奇思迴出
塵寰即事攄懷慧想飛從天際辭成黃絹陋北部
之纖柔詠就紅絲邁西崑之溫麗加以乘風宗慤

欲奮雲霄捧日韓琦思鑄鐘鼎擔當倍切刻勵彌
深齏味啖來預任八紘之重菜根齧斷何憂百事
之爲每讀言志之八章輒深鄙人之三復釐爲一
卷約有多篇爽氣橫空果屬清真絕唱壯心邁世
逼真大雅元音藻也悔然糠功淺敢云築五字之
長城羨抽簞文雄誰則奪三唐之畏壘向從阿咸
論文之次得接應辰漫興之編按節狂歌正襟莊
誦固知篇追雅頌同燕許寄懷翰墨之場從此聲
叶賡歌效臯夔拜手卿雲之殿

東山叔祖詩古文辭悉臻騷雅曩倅瀛江時曾

獲披讀乃簿書鞅掌莫能贊一語茲蓉洲弟以
題詞見示覺筆吐珠光言霏玉屑自足竝振寓
內矣

兄碧巢

松竹之間圖題詞

延平侍御廖夫子孕金粟之靈拔玉華之秀緜道
脈於含雲精舍學接龜山歷勳階於浴日端臺名
高豸府立朝簪筆屢從雉尾以建言退食濡毫偶
倩虎頭而寫照寓意出風塵之表傳神在阿堵之
先展卷流連羣公既爭題七字披圖吟詠賤子亦
敬效一言爾其莊繪平泉園鋪韋曲垂楊曳水疑
遊罨畫之溪新杏凌霞恍入衆香之國霜葩萬朶
雪點胭脂露井千枝煙籠綺繡坊名碎錦裛令尚
感閒情樹類翦綃劉公正饒逸興而夫子則一空

浮豔獨賞清標落落千霄愛留青之偃蓋亭亭騫
漢喜瀟碧之幽篁臨風則濤送檐前照月則光搖
窗外託根不偶只許棲鸞挺幹尤奇偏宜集鳳飽
風霜於萬壑弘景則響落一庭傲冰雪於千竿蔣
詡則叢生三徑貞心期之千古堪比正人勁節貫
於四時足儀君子此則寄託之深也若乃烏石闌
邊小橋斜渡碧苔徑裏棊几橫施蟹眼烹來裹茶
煙之縷縷鰕鬚卷去惹花霧以重重翡翠筆牀箋
霏紅玉琉璃研匣字綰香珠弦譜宮商李勉猶起
響泉之樂園分黑白謝安亦耽賭墅之歡而夫子

則久號書淫夙稱文癖披牙籤於二酉組織靡遺
緡玉軸於五車丹青殆徧千言立就共推燕許之
心裁片字傳來羣服歐曾之手筆雖宦成名立無
庸效咕嗶於蕭齋然心摹手追偏只解沈酣於翰
海下直則一編莫釋惜陰則寸晷必珍寧曰宰相
須用讀書留心墳典亦謂真儒本由積學刻意縹
緗此則嗜好之正也其寄託也如彼其嗜好也如
此宜其丰裁峻整渾如秋月晴雲道貌深醇差擬
金聲玉色一塵不染嘯歌懷白傅之園四韻頻敲
著作高鄴侯之架訝鬚眉之畢現冰雪空明伎圖

畫之寫生煙雲滄鬱風和日麗何妨兀坐以科頭
海闊天空正可舒懷而縱目誰云詩書之內匪我
思存須知松竹之間大有人在

布局宏闊琢句工秀曾有萬卷筆無點塵洵可
前擬徐庾後駕陳吳

程姬田

中州校士餞別圖題詞

塞帷獨出色動輶軒負弩先驅榮生驛路奉簡

書而稱使共推絳帳宗工振儒術以還淳況屬繡
衣直指侍御張靜齋先生中州視學將展臺閣之
宏裁上國贈行迺布雲霞之妙染倩虎頭而寫照
諸公既紛撰蘭言藉鸞尾以抽思賤子亦謬成蕪
製原夫雲漢天章聿重譽髦之選考言詢事猶先
岳牧之咨如僅循例以銓除安見拜恩於特簡
今則職簪白筆從無與文柄之司命下彤庭竟
出自帝心之眷金門宣詔咸欽聖主之識歐

陽玉殿分題共羨鴻篇之追震澤 御製爲人文
而特播玉律金科法書載德意以俱濃鸞翔鳳翥
爰藉柏臺之丰采校士兩河用作芟沼之楷模起
衰八代若乃珪璋琬琰非易得於空山杞梓榱楠
豈叢生於小麓設地乏陸潘之集亦空勞燕許之
搜今則嵩插碧空峰拔坤輿之秀河呈紫氣圖開
羲畫之先自賜商負笈以來學明洙泗泊程邵窮
經而後理抉淵源下帷揮返日之戈喟謠繼晷抱
甕砥迴瀾之柱氣節凌寒合八郡之膠庠蘇海韓
潮競爽供三年之羅網春華秋實兼收然而爲霖

作楫之材端儲學校砥鈍磨鉛之力尤賴師儒使
非秉玉尺以量衡焉能顯冰壺之朗潤今則稱南
宮之領袖接元燈於瞿鄧王唐樹西臺之羽儀標
柱史於夔龍鸛鷺著作則洛陽紙貴區中牛耳同
推奏議則柱後風生地下貂璫亦悚曾經辛苦不
染纖塵早辨妍媸高懸一鏡伸士氣於隱鱗戢翼
喜爭占乎上流勵文風於酌雅秉經洵無虛乎中
土者矣爾乃文旆旋張從官戒其行李先聲乍播
多士賦彼菁莪柳垂太液之絲曳輕波而堪折芹
掇泮池之色霑化雨以彌新相對驪尊非止豔五

雲圖畫遙瞻臯座竚徧聽千里弦歌藻金臺寄迹
頻使登龍斗室濡毫漫收刻鵠方問字於茗椀琴
尊之下載酒非遙適衡文於伊川洛水之間望雲
頓切何圖嘉命謬索荒詞瞻星斗之寒芒光躔角
亢覽煙雲之滃鬱彩映須眉聊譜大賢育士之風
足佐天子右文之治看此日桃紅李白爭誇梁
國門牆知彼都魏紫姚黃勝卜韓公鼎鼐

敘次排宕頓覺文章增價臺閣生風

方靈臯

桐陰納涼圖題詞

翠鬆紅膩賦就媼娥霧薄雲輕描成窈窕爾乃桐
陰百尺高遮點翠之苔花影一闌半卷流蘇之帳
嬌鬢低隨那計妝慵媚眼斜睨非關意倦偶擊團
扇撲將蛺蝶芳園閒倚胡牀懶拂鴛鴦繡枕正恐
巫山夢結頻添萬種惺忪還愁永晝庭空別是一
般滋味紅綃早卸粉汗都消綠綺將彈香心微逗
似相思而斂黛檀几風清獨無語以支頤熏爐煙
細含嬌含笑却疑弄玉行來爲雨爲雲莫把飛瓊
吹去

時瞭眇以含笑復婉媚以愁人覺筆光墨影中
呼之欲出

史西眉

醉紅圖題詞

好風揉百尺之絲香心欲暈輦日烘千枝之粉花
氣斜醺自昔仙郎不乏香囊之解從來才子猶誇
團扇之投何意韻人偏饒豔致羨探奇於驪頰秀
凌羣玉峰前倩寫照於虎頭情寄衆香國裏桃花
綽約嬌漫臉以分紅楊柳纖鬆映曲眉而鬪碧比
韓翃之意結拾翠寧訛等杜牧之情多尋芳未晚
蒼苔翠淺任蟬鬢之行來繡徑紅迷喜鶯聲之喚
起何必紫騮蹀躞賞窮天外韶光即茲綠蟻沈酣
收盡眼前春色莫謂美人腰細魏信陵注念獨真

須知侍女鬢低宋子京臨文益妙麗句付小紅之
度我難忘金谷歌嬌奇懷藉大白之浮君頻共玉
樓人醉

聞清歌輒喚柰何古人正爾多情倘讀斯篇未
知復當作何許也至於字字香豔直壓西崑又
不必言

田大畝

西山蠟屐圖題辭

龍眠山峻公麟曾悞於搜奇雁蕩峰高靈運尚遺
於探勝由來名地緣最愁慳自昔貴人遊偏稱罕
而況地當北戒密邇十丈輭紅景是西山特拔千
尋空翠布煙霞於天際萬籟俱清疊巖岫於雲中
一塵不到洵神京之奧宅真欲界之仙都然非翰
墨驚人羨揮毫於李白焉能江山助我效蠟屐於
謝安我友其純大兄倚闌而為成芍藥體接西崑
傍枕而賦就柗榴文追東部宵中丘壑本無待於
登臨筆下畫圖又奚勞乎皴染而乃上國停驂之

日不廢狂歌燕臺需次之時偏饒逸興爰乘淑候
用事暢遊河渡桑乾漸覺川原之異寺來潭柘便
生蓬閣之思由繡谷以徘徊步香山而眺覽嶺名
昌化俯絕嶂於盤阿塔號靈光峙浮圖於仄徑櫻
桃峪口路轉翠微楊樹灣邊磴懸碧嶼或選韻於
戴雲構裏或諧聲於深雪堂前到處流連敢惜杖
頭之費是間踴躍寧虞屐齒之穿同崔顥以留題
逸思泉湧倩雲林而寫照爽氣朝來咸謂熏彼簿
書不媿雅人深致并知留茲卷軸無媿仙吏風流
羨心境之都超訝鬚眉之畢現從此懸魚室內正

可全少文之臥遊何必落雁峰前定須攜元暉之

警句

工秀流動亦如興公一賦真堪擲地作金石聲

也
吳鶴沙

題梅花畫卷詩引

賦得雪滿山中高士
臥月明林下美人來

一林清瘦恍疑瓊
屑紛披千樹嫵娟
况對冰輪高碾倚
風澹蕩疎影橫斜
照水夷猶香痕深
淺琴尊落落沈酣
翰墨之場環珮珊珊
婀娜羅浮之國覓
圖中之清友雅足
煙霞稱世外之佳
人喜無脂粉詩思
入妙慣尋灞水橋
邊秀色可餐暗點
含章殿側臥袁安
於蓬華清夢偕雪
意俱幽來西子於
苧蘿奇姿與月光
並潔即此繪來筆
蕊儘可移情何必
譜入笛聲方能盡
態僕生自江南遊
茲薊北聞讀廣平
之賦滴粉行間偶
吟和靖之詩生香
字裏

黃金臺畔希逢五出之凌寒白岳峰頭猶憶九英
之映日偶披圖而奪目漏洩春光爰借古以抽思
描摹真色慙非何遜漫嘯詠於雪飄點綴之前媿
異師雄惟低徊於月落參橫之下

玉潤行間香生字裏

林象湖

君山高會圖記

身以歲在昭陽支逢作噩 九重聖主敷文德於
河清海晏之年一代宗工拔英才於水秀山奇之
地公明爲八紘僅見風雅復四海相師江南督學
東海許公獨秀瑤林鍾湖山之間氣擣華玉署領
臺閣之雄編夙推傳說於東宮 特簡廬陵於南
省賓興將屆合吳松常潤以從繩主試無私兼杞
梓梗楠而入穀當文風之丕振正淑氣之初迎爰
於鎖院竣試之餘因有君山讌遊之集畢招多士
咸萃名區原夫君山也者地隸澄江楚相銘邀乎

帶礪星分斗宿趙守賞徧乎林巒望巖壑於雲中
浮嵐虹翠聳樓臺於霞表浴日臨風下矚大江萬
丈之波瀾倒峽遙瞻極浦千帆之樓櫓排空極山
水之雄觀布尊罍之雅座月歌太簇天放新晴人
出錦城一路鶯花似織筵張繡幃四山黛色纔勻
追陪并及參僚延集無分童冠略忘尊卑之分姑
謀賓主之歡隨巖麓以連茵高高下下倚峰林而
藉草淺淺深深郡邑各殊竝坐悉膠庠碩彥齒年
互異相逢咸伊洛門人或離席言歡把盞因而把
臂或聯裾話舊傾觴遂以傾心我師乃遙呼四座

而言今日須各識一時之盛誰其量勝一石追豪
致於公榮疇則韻擅七言羨驚才於子建於是傾
葡萄之百斛側帽而喝盞參差絢芍藥之千章披
襟而揮毫雜沓凭闌疑慮萬籟無聲倚樹狂歌衆
山皆響莫不句成夢得詩就仲宣諸生則刻羽引
商競譜奇逢於五字我公則登峰造頂足傳韻事
於千秋此一遊也備四美焉今夫平山堂裏傳花
猶說歐陽湘水樓頭乘月終歸庾亮假使座無賢
主奚由顯北海之叵羅如其品異謫仙空自斟東
堂之鑿落今則望符名世學仰真儒叔重組織五

經宇宙噪無雙之譽子將楷模六合月旦有第一
之評操玉尺以量才起衰八代朗冰壺而鑑物不
染一塵丰裁則岳峙淵渟氣度則光風霽月以文
章之宗主作詩酒之總持斯美一也若乃分箋梓
澤上客同來修禊蘭亭羣賢畢至居然岸幘孟嘉
之逸氣彌豪不俟更衣王勃之天才益妙務必如
少游得廣寒之句庶無負公著闢大雅之堂今則
震澤雲間靈秀原超天下焦山申浦人文早駕區
中或落紙如飛慣抽五花之寶篋或斷壑自勵佇
對三策於金鑿絡繹行杯不乏班香宋豔紛紜鬪

學大都蘇海韓潮適合四郡之譽髦環侍五雲之
仙子斯美二也至若賓朋盈座最悵佳遊倡和當
筵尤須勝地摩詰每思豪飲多在輞水數灣季真
恒賦開尊必選鑑湖一曲無論面城近市致傷眼
界難舒漫云小阜細流亦歎襟懷未暢今則山容
映被飛鷺在雲煙紫翠之間水色浮天舉酒動廊
廟江湖之想遡蓬瀛之欲到何妨更上一層指雲
夢而直吞正可平瞻千里攜謝朓驚人之什曷禁
情移步錢起得意之篇寧煩神助擇海闊天空之
境爲凭高作賦之區斯美三也且夫斜川歡讌端

卜首春曲水流觴共邀上巳藉令節當溽暑鶉火
揚輝又或候屆沍寒蠻氈怯冷斯卽細梅大厦尚
愁涼燠之侵何況席地幕天得遂酣歌之樂今則
柔颺布淑旣翠暖而香濃麗日舒妍復蘭芬而蕙
馥鳥鳴峰際時欣睨宜人蝶舞筵前恰喜煙霞
如繡鋪來瑶席草密成裊望去珠宮樹深似幕依
稀翠縷汁染李固之衣彷彿紅香花夢江淹之管
韶華正豔悵登臨於問柳之辰春色方賒樂觴詠
於探梅之候斯美四也夫其賢主嘉賓之竝勝非
止誇乎二難兼以天時地利之交宜已早全乎四

美我之懷矣賦雅集之最佳客有請焉羨勝遊之
難再昔者王裴敘往曾圖別墅於靈胸蘇李陶情
尚繪西園於妙手以今準古軼類超倫亟宜藉鸞
尾以留題桃函點就是用倩虎頭而寫照梅軸裝
成藻深慙窺管謬收水鏡之中敢擬碎琴漫託金
臺之畔未離席帽在小子竊感媿於辜恩頻望絳
帷幸我師許追隨而請業乃於問奇之暇語以暢
意之遊并出是圖命爲之記聞之遙登泰岱將隘
域外之觀偶步舞雩輒起當前之悟天光雲影每
拓襟期魚躍爲飛益恢心性閱生絹之烘染萃大

塊之空靈樹裏煙波微茫一片林間靄黛明媚千
般豈惟描丘壑之風流正復訝鬚眉之畢現低徊
良久竟如身在峰頭展玩移時不啻神依座側須
知文隨境遠而從游羣俊慧心見助於江山更識
地以人傳而選勝鉅公名蹟恒留乎圖畫

敷華染幹妙有章程換步移形節節取勝自如
陵先生後復見斯文真絕調也

徐息溟

賜經堂記

晉陵周蓉湖先生靈分洮水系接濂溪學駕區中
早懷校書於劉向名高殿上頻誇奪席於戴憑入
侍經筵出操文柄朗冰壺於山左網羅人重賢良
懸水鏡於浙西庠序教申孝悌量才玉尺稱文苑
之總持晉秩銀臺歷勳階之清要任隆喉舌固已
副特眷於楓宸位列股肱豈知悉受成於萱閣蓋
由殷懃總角瓜每獻於懷中陸續垂髫橘旋傾於
袖裏一官入仕彌切懷思五鼎授糈敢違色養乃
者輶軒北指迎壽母以纜來 綸綍下頒值孝經

之分賜先生爰以名其堂也賤子從而爲之記焉
竊聞王事鞅掌徒增靡盬之憂周道倭遲空切不
遑之詠則雖仰叨 帝寵未能俯恤臣私今則隆
孝治於萬邦久篤宮闈之養志勵承歡於百職無
煩烏鳥之陳情從五雲飛舞而來展卷欣懷 聖
訓自三殿聯翩而下開函更帶天香可誌一也若
乃宣文君德容逾晬本屬希逢郝夫人視聽不衰
實難倖致倘非慶延年於海屋何由慰愛日於華
軒今則起居八座却杖而行止自如課讀三更含
飴而摩挲都徧堂上之朱顏皓髮恒引養而引恬

雲中之芝檢金泥真不先而不後可誌二也然而
意切顯揚幸捧毛君之檄情殷委贄或絕溫子之
裾即勤封鮓於郵筒終媿烹雞於常饌今則庭前
視膳不須望雲舍以興懷閣下傳餐正可向天廚
而分養崔彥昭退朝侍母順色光紀載之中姜公
輔下直娛親承志在形聲之外可誌三也溯夫孝
經也者至德要道夙居百行之先地義天經更出
九重之錫而先生天懷倍摯至性彌純闢堂左之
一規開亭邊之三徑疊巖巒於隙地依稀慧錫移
來滴嵐翠於輭塵彷彿蓬萊飛到好花映日遙聯

上苑之紅密樹籠煙近接鄰園之綠或染翰作擘
窠之字悅親意於鐵畫銀鉤或揮弦譜捉搦之歌
娛慈顏於金徽玉軫或弄鶴雛於瓊砌期展歡眉
或舞龍鐔於瑤階助開笑口芳萱逾茂總思博益
壽之方孝筍獨抽適足符賜經之詔宜乎傳之百
世永拜 國恩播在千秋用垂家法也 藻深慙刻
鵠謬許登龍喜奇字之可詔入座與箏琶之宴羨
孝思之不匱濡毫成瓦礫之詞此日紀北闕之殊
榮龍蟠桂棟他年噪東吳之巨閥鵲繞槐廳
局陣大洗發透駢體中斬關奪隘手也 唐次衣

花嶼軒記

邗溝佳麗六朝羅綺之鄉胥浦空明千載煙霞之
窟聽竹西之歌吹畫舫頻移過瓜步以吟哦綵毫
欲舞偶誦蕪城之賦適來花嶼之軒是軒也地屬
鑿江境摹洛社三逕傍幽齋而闢就成自在之林
阿層巒從曲室以飛來儼天然之圖畫或危峰跳
蕩勢欲摩空或疊嶂欹欹秀俱拔地巖多起伏離
離絕類獅蹲石盡軒騰矯矯渾如鳳翥嵌之複閣
更上一層構以空亭直追百尺迴廊窳窳環遠岫
之菁葱小檻周遭漾微波之綺縠一泓清淺欲賦

平泉幾曲淪連疑遊輞水橋通碧沼游鱗穿荇藻
以東西樹峙丹丘飛鳥雜芳菲而上下爾乃早梅
籠日送官閣之清芬晴杏烘霞玩午莊之韶色桃
映麗人之面繡徑香霏柳妍素女之腰芳苔翠點
姚黃魏紫平臺采采殿春瀟碧空青短砌枝枝消
夏榴花照眼色妬湘裙蕉葉虚心翠分越袖吐嫣
紅於百日何妨獨坐黃昏滴濃綠於三秋大可共
傾白墮銀河澹澹月漏高梧金粟盈盈風生叢桂
菊稱逸叟淵明則興寄籬邊松號正人弘景則響
聞庭際凌寒勁柏從知貞氣蕭森破臘疎枝恍覺

暗香浮動或歷落於翠壁丹巖之下五色齊開或
紛披於方塘曲澗之旁羣芳遞放縱橫一畝園以
仄而愈奇突兀千尋景以幽而倍邃不俟躡謝公
之屐行來繡嶺錦峰無勞停杜子之車望去繁葩
豔卉洵高齋之雅致真別業之奇觀何必創樊重
之朱樓方誇勝槩倣玉根之青瑣始歎華軒也哉
主人光霽澄襟圭璋粹品閒情瀟灑幼輿羅丘壑
於胷中逸興淋漓居易布園林於池上茶鐺酒臼
錯落蕭齋硯匣筆牀追隨斐几古歡並列珍同夏
鼎商彝法帖頻搜蹟貴顏筋柳骨漫麾麈尾欣聆

玉屑之披高捲蝦鬚爲放花光之入畫欄低亞閒
凭而耳目俱仙綺榭逶迤靜對而襟懷益爽人來
嵇阮偏宜漱石枕流客集應劉每快藏鬪限韻張
彩燈於樹杪照波影以重重燒絳蠟於筵前鬪月
華而皎皎花茵狼藉不須地委碧綾苔紙紛飛恰
喜座工黃絹引商刻羽咸推詩酒君宗嘲月吟風
共仰林泉上客乃主人則情殷學府非僅航角里
以忘年訓切義方恒愛坐鯉庭而課業薛氏弟兄
俱鳳都人噪文苑之雄荀家少長皆龍太史奏德
星之聚展曹倉之玉軸組織須工繙鄴架之牙籤

丹黃宜遍香消銀鴨三更猶督呬唔漏轉銅龍五
夜尚勤攻苦咏茂叔文窗之草生意彌新夢江郎
斑管之花慧思轉曲班香宋豔劈十錦之蠻箋叶
鳳懷蛟抽五花之寶篋策勲翰墨在哲嗣各精臺
閣之鴻文適意琴尊惟主人最得丘園之別趣也
藻也菽圃徒窺學山有忝接公道貌如逢賀監於
鏡湖入此名軒奚異裴君之綠野煙巒縹緲即在
艸堂月嶼迷離頓成花塢疊斟犀笋公每開文舉
北海之尊敬綴駢詞僕敢擬永叔東園之記
家子厚叔祖僑寓真州于所居旁構別業疊石

栽花頗得勝槩顏曰花嶼軒閱此記叙次歷落
覺洛社香山去人不遠至末段歸重課讀尤爲
知本之言 兄千波

貞節汪母金孺人傳贊

孺人姓金氏叔祖諱有庶字振蕃公之元配本邑
城南太學生金文暉公長女也生而淑慎長益端
凝淑女秀秉蘭閨頗嚴求夫坦腹君子才高藝苑
洵無媿乎齊眉爰因對字之深知遂賦盈門之燕
喜冰清玉潤羨樂令之得衛郎瑟友琴和悵伯鸞
之逢德曜却裝資而弗御雅追挽鹿之風助膏火
以相資用播懷蛟之譽是時振蕃公理析關閩名
符終賈寒砧斷續偕吟詠以同聲夜織淒清共呬
唔而荅響從容佐讀爭稱室內良朋婉婉承歡尤

號堂前佳婦務竭陸橘江魚之養潔滌髓以奉盤
匱雖值米珠薪桂之時脫簪環而謀甘旨既高堂
之曲體孝足怡顏復大事之克勩貧能中禮爾乃
縹緲蔚若徒饒叔治之五車囊橐蕭然適等相如
之四壁懷奇羅隱未能釋褐以升負異班生幾欲
棄觚而歎於是間關千里挾策三河方以績學相
師競向雲亭而問字何圖積勞成疾旋從瑤闕以
修文孺人纔際芳年乍聞惡耗悲深齧指堪崩防
敵之城恨極填膺欲化望夫之石魂兮未遠奚難
踐同穴之成言兒也何依能勿效倚閭之深教勉

作程嬰之苟活姑爲其難咸欽荀采之幽閒終歸
於正而乃斗筭不繼豈無米以能炊絡緯時勤恃
縫裳而待爨給饗殮於十指無春匪秋傷荼堇於
寸心有宵靡旦拚擋備至在嫠婦何妨并日之餐
督責無寬惟藐孤敢緩及時之學仲郢舌含熊膽
彌彰刻勵於慈親虞集口授麟經益顯勤劬於賢
母旣而箕裘得紹猶申敬姜勞逸之箴冰雪自持
永守鳳嫺艱辛之誓足不窺乎戶外無分壯歲耄
齡孫早繞乎膝前稍慰冬溫夏清菽水情殷愛日
願尊家督於人間松筠節可維風忽返皇娥於天

上享年七十有六於戲共姜矢志兩髦詠而之死靡他葛婦全貞九騷歌而未亡倍凜或截髮表凌霜之操或割耳堅皎日之盟莫不嫩著青編芬流彤管今孺人哀吟寡鵠當廿七歲而夢斷三生撫育遺雛歷五十年而節如一日潔比練江之月徹底皆明幽同落石之波纖塵不染嗣君寅先叔氏備陳苦節謬索蕪詞藻也閒披古本每咨嗟毛鉦之奇貞博覽叢編最太息伯姬之芳烈何況誦德音於當代立懦廉頑標高行於吾宗承先啓後爰撰庾徐之儷語用傳房翟之高蹤贊曰

烈稱令女節美共姜以觀賢母堪與頡頏風高篔簹德叶玳瑁牛衣共慰鴻案相莊歡承菽水孝侍尊嫜迨悲寡鵠遽斷哀腸藐孤誰託勉作未亡素心映月貞氣凌霜旣承弓冶復勵綱常敬書彤管千載流芳

嘗論婦人守節難貧而守節尤難吾伯母金氏于歸數載遽失所天矢志撫孤茹荼食苦歷五十年得此文爲之表彰伯母死且不朽當世有風教之責者采風閭里上達九重則此文庶幾爲實錄焉叔鳴韶

伯母抱五十年苦節得斯文表彰懿行實足以
傳不朽是當與柏舟之什並炳古今矣
弟迎年

徵節孝詩文啓

竊聞堤邊勁草不畏淒風嶺上寒松何嫌嚴雪玉
遭焚而倍潔珠韜晦以彌珍載攷共姜兩髦矢志
并稽龐婦十指供餐以千古而擅徽柔尚足馨流
彤管況一人而兼節孝可無媿誌青編如我從嫂
程孺人者從兄公濟之元配也系分伊洛立白雪
以傳經派衍篁墩泣黃堂而判牘遞鍾賢哲竝毓
名閨孺人幼即端莊長而淑慎幽閒特異柔姿霏
九畹之蘭清勁絕殊貞性傲三湘之竹無事辨絃
詠絮已誇習禮敦詩時值鳴鳩人堪挽鹿謝桓氏

之釵鈿原甘澹泊操梁家之井臼正足拚擋弋鴈
相加鳴雞有警夫使白頭偕老常肅鴻案以偏齊
青鬢無違即擁牛衣而亦慰而乃畫眉未久張京
兆忽賦遠游作客方豪沈休文竟罹多病隨由淮
水急返海陽購藥則不惜脫簪供湯則未嘗解帶
籲天減算甫續命於三年搶地傷心旋化形於一
旦夫魂未遠何辭同穴以要盟遺腹將離安忍承
祧之乏嗣且念太姑已耄藜藿誰供倘非貞婦相
依桑榆奚託爾乃獨裁襁褓幸一索之得男早紹
箕裘欣九原之有主設也傾箱倒篋崔令淑室有

餘貲衣稅食租已懷清家饒積貯縱令致悲寡鵠
猶可坐擁孤雛何圖窮鮮立錐縫裳度金鍼午夜
窶同懸磬織素聽銀漏三更作靡間乎終年奚傷
況瘁食無妨於并日轉覺從容養八旬於垂暮之
秋闈內重瞻寶媛存一綫於未亡之日閨中恰得
程嬰既黽勉乎有無復依違乎形影然或芻將薦
劉士行以象服娛親荻作灰描永叔以魚軒奉母
雖云荼苦終獲蔗甘今則藐孤纔及成人賢母遂
悲即世藥名獨活空憐燕影於疎簾草號寄生頓
泣鶻聲於素幌方其哀分玉鏡正當廿七芳齡迨

乎仙赴瑤臺適屆五旬初度漂搖風雨操經百折
而不回凜冽冰霜氣抗千秋而常在宜乎迴車天
上不聞二豎之侵樹範人間無俟九騷之作也嗟
乎盤根錯節不多見於鬚眉翦髮磨筭尤希逢於
巾幗孝能養志何難作無米之炊節可存孤更復
凜斷機之教身兼大義比金石以逾堅心秉幽貞
較郝鍾而益烈行將聞諸當事上邀 綸綍之褒
預爲徵我詞宗永播笙簧之雅伏願燕許鉅公溫
邢上客或文工碑版表毛鈺之忍死事姑或詩叶
宮商詠鳳嫺之含酸撫子將見染湘東之銀管用
彰飲檠茹冰劈河北之瑤牋足令廉頑立懦不辭
糠粃惠貺瓊琚

情文悱惻可以慰孝婦於九京可以維風教於

百世 叔紫滄

蔡端巖銓部和限字詩跋

限字體內限一二三四五六七八九十百千萬億黃赤青白黑紅紫碧綠翠
藍半分寸尺丈竿尋斤兩錢分釐毫絲忽微纖沙塵石斛升斗合勺撮
抄圭粟顆金石絲竹匏土革木其韻限樓遊流留秋塵真人伸綸餘
居書疎魚論存孫樽墩共八十三字以七言四律收之今跋亦用四律
字數內限
八十三字

八斗真才始工七步千秋絕調早革纖塵然非金
粟分身討論六庫焉能圭璋合度貫串五音抄古
撮今賤子漫億兩都之賦吟風嘲月先生直升百
尺之樓澄流品而號正人毫釐不爽借餘閒而拈
限字匏土克諧萬斛木難顆顆吐來鮫女九霄文
綺絲絲織自天孫絕無斤斧之痕印沙疏石聊伸

經綸之手翦綠裁紅錢起工吟三唐樹幟藍承善
詠二酉羅宵書就青箱雅竝紫薇黃竹歌分翠袖
居然白雪赤霞忽值假旋用尋韻事輒塵十丈暫
去而畫省留題美醞一樽微醺而墨池盡黑勺波
學海我媿踈姿寸管生花公存別體椒墩石畔半
竿偶羨游魚碧玉箋中四首羣推繡虎

綃幕吐其靈蛇霞梭分夫皓月只聞宮商之奏

不見筆墨之痕

朱海士

程北山賦得誰家紅袖倚高樓集唐十首跋

曉雲迴夢愁聞閣外花聲春日凝妝怕見陌頭柳
色出高樓而獨倚相傳紅袖嬌娥聽商調以作歌
原屬青衫司馬閭仙先生丘錦蟠曾江花入夢適
在賈島祭詩之候溯古意於香奩偶偕江拱刻燭
之餘觸微吟於素壁爰借題而寄意各依韻以抽
思而我友北山程子即席口拈旣賦七言之二律
含毫意邈復集十首於三唐聞之藕絲無力偏解
纏絲柳絮何心任嗤輕薄美人腸斷頻教弱緒惺
忪少婦心情翻悔別時容易看翦春山之翠空惜

含顰眼橫秋水之波徒嗟結睇登樓遙望不知驛
路幾千俯檻平瞻正隔巫峰十二芳草怯江南之
岸綺想何窮垂楊曳塞北之堤離思曷極爾乃花
能釀蜜竟體皆芬沙可淘金觸懷成彩悉泯組紉
之迹對仗彌工並化糟粕之痕貫穿入妙豔同織
錦巧過聯珠因示鄙人命爲小跋嗟乎綵毫欲舞
丈夫宜早雄飛繡篋頻緡處姊何堪終守正則感
吟騷體非僅關沅芷澧蘭泉明愛賦閒情豈真在
朱幃清瑟敘臙脂於北部不盡流連述羅綺於南
都況傷遲暮壯心歷落姑浮大白以澆愁美句纖

絲須倩小紅而度曲人徒訝搓酥滴粉掇香詞於
開元大曆之間僕已知濯秀搴芳託遙致於流水
高山之外

香豔直逼西崑而意致纏綿深情婉麗真是絕
世風流

李澄園

吳小眉應教謝恩詩跋

江醴陵澄霞散綺應教東都沈僕射刻羽引商分
題西邸而況題橋念切欣來上國以凌雲擲地聲
高果進梁園而賦雪綵筆千言立就不讓馬卿宮
門半夜常開奚誇枚叟裊翡翠乍從蘭坂之遊
醴設葡萄旋賜桂山之宴在賢王當文恬武熙
之日不惜忘分下交而上客展鳳觀虎視之才能
無感恩驚寵比諸庾信貺倍重乎華繒譬彼劉楨
珍寶逾乎寶帶榮光旣渥禮數尤寬爰裁十律之
吟用誌千秋之雅劈箋選韻我極媿乎汪遵擊鉢

成詩君何慙乎吳質鄴下播嘉賓之譽斯時文壓
應徐禁中呼才子之名他日聲齊元白

澄霞散綺夏玉樅金

張照人

